



19-11-2020

UKA2020/91

Illoqarfinni nunaqarfinnilu, immap tinittarnera ulerujussuarterneralu pillugit, angallatinut umiarsuarnullu talittarfiit qarsunneqartaleriartuinnarneri, isumannaannerusumik aaqqissuunneqarnissaat siunertaralugu, UKA2021-mut naammassereersimasussamik Naalakkersuisut pilersaarusoqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Siverth K. Heilmann, Atassut)

Inatsisartunut ilaasortaq Siverth K. Heilmann, Atassut illoqarfinni nunaqarfinnilu, immap tinittarnera ulerujussuarterneralu pillugit angallatinut umiarsuarnullu talittarfiit qarsunneqartarnerat pillugu Inatsisartut aalajangiiffigisassaattut tassalu Naalakkersuisut pilersaarusoqqullugit tamannalu oqaaseqarfigisavarput.

Nunatsinni malunnartumik ukiuni kingullerni immap tinittarnera ulittarneralu assut allangorsimavoq ilaatigut talittarfinnik umiarsualivinnilu qarsutsinerit annertoorujussuit nalaattalersimavagut ilaatigullu aamma sissamut qanittumik illuutillit pigisaasa qarsunneqartarnerinik kinguneqartalersimallutik, tassuuna takuneqarsinnaavoq suli annermik annertunerusumik sillimmartaarnissaq eqqumaffigisariaqaleripput.

Kiisalu immikkut aamma soorunani maluginiartalernikuupput Qaammatip ulikkaarnerani aammalu sila unerisimatinnagu ilaatigut anorersuarmik nalaassinermi ulerujussuarneranik tinerujussuarneranillu kinguneqartarlutik.

Imaatigut angallanneq nunakkut inoqarfiit akornanni aqqusineqanginnatta pingaartorujussuavoq aamma isumannaallisaneq eqqarsaatigalugu. Angallatit ingerlaarfii isumannaatsumik immap itissusiata aamma eqqortumik itissutsit nakkutigineqarnissaat pingaartorujussuusoq Atassutip siunnersuummini tunngavilersuutitut ilanngussaa ilumortoq oqaatigisavarput. Tassami ikkarluit siornatigut takuneq ajukkagut ingerlaarfinni takusalernikuusagut arlerinartorujussuannngornikuupput tupinnanngitsumillu ilaatigut ajutoornernik amerlasunut kinguneqartalernikuupput.

Umiarsuliviit talittarfiillu isumannaallisarnissaat illoqarfinni nunaqarfinnilu arlalinni pinngitsoorneqarsinnaarpasinngilaq taamaattumik siunnersuutip itigartiinnarneqarnissaanik Naalakkersuisut akissuteqarnerat ajuusaarnartutut tiguarpud. Kisianni taanna uniffigiinnarnagu siunnersuutip ataatsimiititaliamut suliassanngortinneqarnissaat Partii Naleqqamiit innersuupparput.

Hans Enoksen